



La suprazionza dall'Uniu la pendentia. Da sen. Leo Condrau, Edgar Durschei, Urs Fülcher, Christian Loretz, Wendelin Jacomet, Victor Flepp ed Adrian Defflorin.

FOTO MAD

## Il destin da «La Pendentia» dependa dalla finanziaziun

La punt pendentia sur il Rein da Mustér a Mumpé Medel ei calculada cun cuosts da 1,8 milliuns francs. 1,1 milliuns francs ston vegnir dall'interessenza privata. Pigl auter ei il project madirs per vegnir realisau. Da vart dil Cantun dat ei apparentamein buca pli grondas resalvas.

HANS HUONDER/FMR

«El rom dalla secunda preexaminaziun dil project havein nus survegniu dil Cantun in clar signal che la punt pendentia seigi realisabla aschia. Da scolar ein ussa aunc sulet entgens detagls», di il coninziat dalla punt, *Christian Loretz*. L'Uniu La Pendentia che ha remplazzau dacuort la cumionza d'interess ch'era seformada per quei project, quenta era buca pli cun gronda opposiziun dallas organisaziuns digl ambient. «Nus savein buca excluder quei, mo essan da principi dil meini che nus hagian ademplier ussa tuttas pretensiuns ch'ei vegnidas fargas gia tier l'emprema preexaminaziun dil project», di *Wendelin Jacomet*. Las proximas jamnas duei il plan general d'avertura vegnir surluvraus ed el decuors dalla primavera e la stad duei quel passar las tortas politicas. Sil pli tard igl atun vul l'uniun allura inoltrar la damonda da baghegiar per la punt. «La finamira ei da baghegiar ella 2023 per aschia saver arver ella la stad, sil pli tard igl atun 2023», di *Wendelin Jacomet*. Cun quei plan da termin ha l'uniun ussa in onn retard silla finamira oriunda: «Il process politic ha frenau il project.»

### La finanziaziun ei decisiva

La punt pendentia cuosta 1,8 milliuns francs, inclusivme in la planisaziun e 100 000 francs che la vischnaunca ha gia impundiu pil project. «Da quella summa lein nus recaltgar 1,1 milliuns francs da privats ed instituziuns. 700 000 francs duein vegnir dil maun public, denter auter dalla vischnaunca», di *Wendelin Jacomet*. Avon in onn havevan ils iniziants denton aunc punctuau: «Sche pusseivel duei la vischnaunca buca vegnir engraviada finanziamein.» Recaltgar la summa da 1,1 milliuns francs da personas privatas, fatschentas, organisaziuns ed instituziuns astgess esser ina dira nusch. «Nus essan perscuadi che quei reussescha. Cun quei engaschament finanziel lessen nus mussar alla vischnaunca che la punt ei giavischada», di *Christian Loretz*. L'uniun ha era gia ina clara finamira tgei che duei succeder culla punt suenter la realisaziun. «Lu duess la vischnaunca surpender ella e procurar pil menaschi», puntuescha *Wendelin Jacomet*.

### «La punt pendentia savess esser ina grond'attracziun dalla Via franciscana da Constanza a Padua.»

Christian Loretz, in dals iniziants dalla punt pendentia

### La pli liunga dil Grischun

Cun rodund 300 meters vegn la punt pendentia – construida cun sugas d'itschal ed in plantschiu da lenn – da S. Gada a Ragischs sut Mumpé Medel, ad esser la pli liunga dil Grischun. Il pli ault punct tiel funs dalla val cul Rein anteriur mesira 100 meters. La punt duei esser ina colligiazion pils vischins da Mumpé Medel cun Mustér, mo lu era in magnet turistic. «Ella savess esser ina grond'attracziun dalla Via franciscana da Constanza a Padua. Ella cumpletescha denton era la Via romana veglia da Mustér sur Mumpé Medel en direcziun Lucmagn», puntuescha *Christian Loretz*. Als da Mumpé Medel savess ella era survir sco passadi muments che la via cantunala ellas Ruinas ei serrada, sco igl ei stau il cass pliras ga ils davos onns. S. Gada ei buca lunsch naven dalla staziun d'Acla da Fontauna dalla Viafier Matterhorn Gottard. La vischinonza al traffic public ei pia optimala. Tenor ils iniziants fess la

punt pendentia l'ideala colligiazion era per turas da skis, gianellas ni per serender silla via da scursalar a Mumpé Medel. «La vischnaunca ei lundervi da cumprar ils stabiliments d'Arma Suisse a Ragischs e l'Uniu Fortezia Stalusa fess allura prompta d'offerir leu ina purschida per indigens e turists. Era sco access a quei areal fess la punt optimala», di *Wendelin Jacomet*.

### Partenza dalla campagna

«Per saver realisar la punt essan nus dependents dil sustegn dils indigens ed era dils possessurs da secundas habitaziuns che han in representant ella suprazionza dall'uniun. Cun ina contribuzion denter 30 e 100 francs san ins d'entantar commembra ni commember da noss'uniun», puntueschan ils iniziants. Commembers seigien beinvegni era per s'engaschar ni semplamein era per vegnir cun bunas ideas. Quels dis ha la campagna da rimnar daners entschiet. «Nus havein scaffiu ina homepage (www.pendentia.ch), lein s'engaschar sillas medias socialas, derasar ina carta da participaziun ed era empruar da financiar ina part cun'in acciun da crowdfunding», di *Christian Loretz*. Medemamein spera l'uniun da survegnir ina contribuzion essenziala dil Cantun el rom dall'activitad dil traffic plaun. Tier la vischnaunca ha l'uniun aunc buca splntau: «Quei lein nus far quei mument che nus havein rimnau 1,1 milliuns francs.»

### In'attracziun turistica

D'ina vart duei la punt pendentia da S. Gada a Ragischs esser ina colligiazion pil mintgadi, da l'autra vart in'attracziun turistica. «Las frequenzas generadas da punts pendentas sco attracziuns turisticas en differents loghens muossan ch'ellas ein vers magnets», puntuescha *Christian Loretz*. La punt «Geierlay» en Germania attili mintg'onn 250 000 visitaders, quella dil Sattel 100 000 e la Ponte Tibetana el cantun Tessin rodund 50 000 personas.

### NATIRA



In luf-tscherver registraus d'ina dallas 76 fototraplas dil monitoring. FOTO UFFECI DA CATSCHA E PESCA DIL GRISCHUN

### 15 lufs-tscherver independents en Surselva e Viamala

En collaboraziun culla Kora – il post federal specialisau sin animals da rapina gronds – ha la surveglonza da catscha dil cantun Grischun arranschau igl unviern vargau in grond monitoring dil luf-tscherver. Quel ei succedius sin intschess dils districts dalla Surselva e Viamala. Il monitoring ha giu la finamira d'eruir cons lufs-tscherver che sesanflan il mument en quels dus territoris. Persuenter ein 76 cameras da fotografar automaticas vegnidas piazzadas en loghens claramein defini. Quellas ein stad en funcziun duront dus meins. Grazia a quella metoda san lufs-tscherver vegnir identificai sin lur muster individual dil peil. Sco quei ch'igl Uffeci per catscha e pesca dil cantun Grischun scriva en ina comunicaziun, vivan 1,3 lufs-tscherver sin 100 km quadrats da quels dus territoris. Quei corrispunda ad ina populaziun da 15 lufs-tscherver. El rom dil monitoring eis ei plinavon reussiu d'eruir ch'ei ha dau igl onn 2020 silmeins quater ga letgs da lufs-tscherver. Ordeifer ils districts Surselva e Viamala vivan singuls lufs-tscherver el Signeradi, Portenza, Grischun Central ed Engiadina. Igl onn 2021 ein negins animals da nez vegni scarpai da lufs-tscherver. (fmr/hh)

### BREIL



Ils ustiers dalla Casa Fausta Capaul ein da niev part dalla Gilda. Ils ambassadurs dalla Gilda *Jaqueline Rodolph (sen.)* e *Toni Darms (dretg)* han dacuort surdau il commembradi a *Tobias* e *Selina Lechmann-Albrecht (amiez)*.

FOTO MAD

### La Casa Fausta Capaul ei part dalla Gilda

Ils ustiers dalla Fausta Capaul, *Selina* e *Tobias Lechmann-Albrecht*, ein dacuort vegni pri si ella Gilda, ina associaziun da biabein 300 etablidastiers ed ustiers svizzers. La Gilda exista dapi varga 60 onns e representa, tenor atgnas indicaziuns, ina filosofia da qualitat e creativitat che sedrezza cumpleinamein als bagesns dil hosp. Ambient, survetsch e cuschina ston ademplier ils criteris defini els statuts per che la Gilda surdetti il logo ed il commembradi. La Casa Fausta Capaul da Breil po ademplier quels criteris ed ils giuvens ustiers han giu grond plascher dalla viseta digl ambassadur dalla Gilda, *Toni Darms* e sia successura *Jacqueline Rodolph* che han surdau dacuort l'insignia dalla Gilda. La Casa Fausta Capaul posseda ina veglia tradiziun e *Tobias* e *Selina Lechmann-Albrecht* han surpriu cun la fleglia *Nina Sofia* sin bratsch cun plascher il tgamun da quella casa il matg 2020. Seapescha ch'els davos meins ein buca ual stai sempels per il giuvens ustiers e hoteliers. La pandemia ha caschunà a l'entira gastronomia d'abiezza rumpatesta. Las reservaziuns per las jamnas proximas ein denton empermettentas. L'equipa en cuschina ed el survetsch ei completa e prompta. Danovamein procura la pandemia per malsegirtads e serrar il menaschi duront las proximas jamnas fess buca mo per *Selina* e *Tobias Lechmann-Albrecht* ina ulteriura nauscha frida. Ils ustiers dalla Fausta, sco ella vegn numnada e Breil, ein leds da saver tgamunar sco menaschi da famiglia ina ustria da tradiziun e selegran sin hosps da lunsch e da maneivel. (fmr/ac)